



Број/Број: **01/2а-50-1-2-68/10**

Сарајево/Sarajevo: 30.6.2010.

ZAPISNIK

68. sjednice Komisije za vanjske poslove Predstavničkog doma Parlamentarne skupštine BiH, održane 30.6.2010.

Sjednica Komisije počela je u 9.30 sati. Prisustvovali su: Slavko Matić, Husein Nanić, Azra Alajbegović, Lejla Klokić i Denis Bećirović.

Odsustvovali su: Azra Hadžiahmetović, Milica Marković, Milorad Živković i Sefer Halilović.

Osim članova Komisije, sjednici su prisustvovali: Senad Bužimkić iz Ministarstva vanjskih poslova BiH, Samir Rizvo iz Ministarstva sigurnosti BiH i Miroljub Krunić iz Ministarstva finansija i trezora BiH.

Sjednicom je predsjedavao Slavko Matić. On je pozdravio prisutne i otvorio raspravu o dnevnom redu 68. sjednice Komisije.

Miroljub Krunić iz Ministarstva finansija i trezora BiH sugerirao je da se u dnevni red stavi još jedan sporazum koji je naknadno pristigao Komisiji, a koji je usko povezan s jednim sporazumom koji je već u dnevnom redu 68. sjednice Komisije.

Denis Bećirović kazao je da sporazum nije dostavljen na vrijeme i da, stoga, nije mogao biti upoznat s njim.

Predsjedavajući Slavko Matić kazao je da će se taj sporazum ostaviti za narednu sjednicu Komisije jer nije na vrijeme dostavljen poslanicima.

Nije bilo drugih prijedloga, te je za 68. sjednicu Komisije za vanjske poslove jednoglasno usvojen sljedeći

DNEVNI RED

1. Usvajanje Zapisnika 67. sjednice Komisije;
2. Davanje mišljenja o suglasnosti za ratificiranje:
 - a) Konvencije o Centru za provođenje zakona u Jugoistočnoj Evropi, potpisana 9.12.2009. u Bukureštu (resorno ministarstvo: Ministarstvo sigurnosti BiH),
 - b) Sporazuma o zajmu između Bosne i Hercegovine i OPEC-ovog Fonda za međunarodni razvoj – *Projekat unapređenja uslova života na selu* (resorno ministarstvo: Ministarstvo finansija i trezora BiH),
 - c) Sporazuma o zajmu između Bosne i Hercegovine i Međunarodne banke za obnovu i razvoj – *Projekat za otpadne vode u Sarajevu* (resorno ministarstvo: Ministarstvo finansija i trezora BiH),
 - d) Sporazuma o zajmu i projektu KfW-a, Frankfurt na Majni, i Bosne i Hercegovine i Federacije Bosne i Hercegovine i Javnog preduzeća “Elektroprivreda Hrvatske zajednice Herceg-Bosne” d.d. Mostar, za projekat “Vjetroelektrana ‘Mesihovina’” (resorno ministarstvo: Ministarstvo finansija i trezora BiH);
3. Izvještaji i materijali pristigli Komisiji:

- a) Prioriteti belgijskog predsjedavanja EU, juli - decembar 2010. – informacija (materijal MVPBiH),
 - b) Sastanak Vijeća EU za vanjske poslove, 14.6.2010., u Luksemburgu (materijal MVPBiH),
 - c) Kopija pisma predsjednice Odbora za zaštitu okoliša Hrvatskog sabora s inicijativom za održavanje zajedničkog sastanka Odbora za zaštitu okoliša Hrvatskog sabora s predstavnicima nadležnog tijela Parlamentarne skupštine Bosne i Hercegovine (materijal MVPBiH);
4. Tekuća pitanja.

Ad.1. Usvajanje Zapisnika 67. sjednice Komisije za vanjske poslove

Zapisnik 67. sjednice usvojen je jednoglasno, bez primjedbi.

Ad.2.a) Davanje mišljenja o saglasnosti za ratificiranje Konvencije o Centru za provođenje zakona u Jugoistočnoj Evropi, potpisana 9.12.2009. u Bukureštu

Samir Rizvo iz Ministarstva sigurnosti BiH je u vezi s ovom konvencijom kazao da je 1999. godine u okviru Pakta za stabilnost potpisan Sporazum o saradnji u borbi protiv prekograničnog kriminala i po tom sporazumu osnovan je Regionalni centar za borbu protiv prekograničnog kriminala, poznatiji kao SECI centar. U tom centru u Bukureštu su oficiri za vezu iz policijskih i carinskih službi iz 13 zemalja jugoistočne Evrope. Oni tamo rade zajedno, razmjenjuju podatke, planiraju i provode zajedničke akcije i istrage u regionu. Prije tri godine uočeno je da taj sporazum, na osnovu kojeg je formiran SECI centar, ima izvjesne nedostatke, prije svega koji se odnose na procesuiranje i zaštitu ličnih i tajnih podataka. Zbog tih nedostataka nije bilo moguće razvijati saradnju s EUROPOL-om i drugim međunarodnim organizacijama koje imaju sličnu funkciju te se, stoga, pristupilo izradi nove konvencije koja je usaglašena sa svim evropskim standardima u vezi s oblasti iz zaštite podataka, razmjene i zaštite tajnih podataka. Ovom konvencijom predviđeno je da se taj SECI centar preimenuje u SELEC centar, odnosno Centar za provođenje zakona u jugoistočnoj Evropi. Nekih velikih promjena u odnosu na organizaciju i funkcioniranje dosadašnjeg centra nema, ali će ona omogućiti da se Centar dalje razvija i uspostavlja bliske odnose s EUROPOL-om i sa svim drugim međunarodnim organizacijama.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ove konvencije.

Ad.2.b) Davanje mišljenja o saglasnosti za ratificiranje Sporazuma o zajmu između Bosne i Hercegovine i OPEC-ovog Fonda za međunarodni razvoj – *Projekat unapređenja uslova života na selu*

Miroljub Krunić iz Ministarstva finansija i trezora BiH kazao je da je ovo sporazum kojim se predviđa finansiranje ruralnog sektora. Vrijeme otplate je dvadeset godina, uključujući pet godina grejs perioda, s kamatnom stopom od 3,5 %, pri čemu se plaća jedan procenat troškova kredita na sredstva koja su povučena, a nisu otplaćena. Za sporazum su provedene sve neophodne procedure.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad.2.c) Davanje mišljenja o saglasnosti za ratificiranje Sporazuma o zajmu između Bosne i Hercegovine i Međunarodne banke za obnovu i razvoj – Projekat za otpadne vode u Sarajevu

Izvjestilac i za ovaj sporazum bio je Miroljub Krunic iz Ministarstva finansija i trezora BiH. On je kazao da je riječ o projektu čiji je cilj unapređenje uslova života stanovništva u zajednicama nizvodno pored rijeke kroz smanjivanje izloženosti stanovništva i njegove ovisnosti o veoma zagađenoj vodi iz rijeka Miljacke i Bosne i unapređivanje efikasnosti mreže za prikupljanje otpadnih voda u Kantonu Sarajevo. Vrijednost zajma je 23.600.000 eura s rokom otplate od 25 godina, uključujući 5 godina grejs perioda.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad.2.d) Davanje mišljenja o saglasnosti za ratificiranje Sporazuma o zajmu i projektu KfW-a, Frankfurt na Majni, i Bosne i Hercegovine i Federacije Bosne i Hercegovine i Javnog preduzeća “Elektroprivreda Hrvatske zajednice Herceg-Bosne” d.d. Mostar, za projekat “Vjetroelektrana ‘Mesihovina’”

Miroljub Krunic kazao je da su cjelokupna sredstva iz ovog projekta alocirana na Federaciju Bosne i Hercegovine. Projekat je koncipiran na području Mesihovine i riječ je o izgradnji sistema vjetroelektrane odnosno vjetroparka snage 44 MW (megavata). Iznos zajma je 71 milion eura i sredstva su osigurana na bazi dva sporazuma o finansijskoj saradnji između BiH i SR Njemačke iz 2007. i 2008. godine.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad.3. Izvještaji i materijali pristigli Komisiji:

- a) **Prioriteti belgijskog predsjedavanja EU, juli - decembar 2010. – informacija (materijal MVPBiH)**
- b) **Sastanak Vijeća EU za vanjske poslove, 14.6.2010. u Luksemburgu (materijal MVPBiH)**
- c) **Kopija pisma predsjednice Odbora za zaštitu okoliša Hrvatskog sabora s inicijativom za održavanje zajedničkog sastanka Odbora za zaštitu okoliša Hrvatskog sabora s predstavnicima nadležnog tijela Parlamentarne skupštine Bosne i Hercegovine (materijal MVPBiH)**

Članovi Komisije primili su k znanju izvještaje i materijale pristigle Komisiji.

Predsjedavajući Matić konstatirao je da nema materijala za razmatranje pod tačkom “Tekuća pitanja” i zaključio sjednicu.

Sjednica je završena u 9.50 sati.

SEKRETAR KOMISIJE

Merdžana Iglia

PREDSJEDAVALA KOMISIJE

Slavko Matić

Dostavljeno:

- naslovu
- a/a